

歷代貢舉志
歷代武舉考
貢舉敘略
科場條貫
學科考略
臚傳紀事







歷代貢舉志

馮夢禎著

編主五雲王

編初成集書叢

種五他其及志舉貢代歷

中華民國二十六年十二月初版

發行人

王

長沙南正路

雲

五

印刷所

商

長沙南正路

務

印書館

發行所

商

各埠

務

印書館

(本書校對者黃津祥
潘同曾
印頌文)

製鑄
嚴壽

歷代貢舉志

明 秀水馮夢禎開之著

貢舉之有科目。蓋未之前聞也。雖周曰三物。曰四術。曰九年大成。試之似有定塗。曰選士。曰俊士。曰造士。曰進士。取之似有定序。曰論定。曰任官。曰位定。用之似有定制。大都極其詳慎。若此。而賓興而拜受。又極其隆重。若此。初未以一定科目。薄試于始。厚任于終。賤視于先。尊顯于後。若今茲也。秦稱虜用其士。而仕進之塗。闢田勝敵之外。無多寄徑焉。漢初。詔賢士大夫。既與我定有天下。而不與吾共安利之。可乎。郡守身自勸遣。嗣是詔孝悌復一身。置官二千石。建元初。詔天下舉賢良方正直言極諫之士。以董仲舒請。令郡國歲舉孝廉。限以四科。一曰德行高妙。志節清白。二曰學通行修。經中博士。三曰明習法令。足以決疑。能按章覆文中御史。四曰剛毅多略。遭事不惑。明足決斷。材任三輔縣令。元光五年。徵吏人有明當世之務。習先聖之術者。縣次給食。令與計偕。元朔初。天下謹法。莫敢謬舉。而貢士蓋鮮。故又詔中二千石及禮官博士。議不舉者罪。郡國乃於屬僚部人之賢。舉爲秀才廉吏。貢于王庭。多拜爲郎。居三署。無常員。而公車徵起者。悉在焉。元封五年。詔州縣察吏人有茂材異等。可爲將相及使絕國者。元朔五年。詔二千石謹察可者。常與計偕。詣太常。得受業如弟子。其高第。可以爲郎中者。太常籍奏。始元初。遣王平輩持節郡國。舉賢良。本始後。王吉請明選求賢。除任子弟之令。永光初。詔丞相御史。舉質朴重厚。退遜有行者。光祿歲以此科第郎從官。王莽時。太常歲課。甲科爲郎中。乙科爲太子舍人。丙科爲文學掌故。後漢建武間。詔舉

茂才廉吏三公而下。其數有差。于時進用。加以歲月先後之次。且卒焉特拜。不復簡試。故謗議紛起。良以士多矯飾也。建初初。復用故事。以四科辟士。永建後。又增甲乙科。左雄議改察舉之制。胡廣輩不能駁其議。張衡輩不能復其試。得按得疑後之訛。黃瓊爲尙書令。乃以雄所上孝廉之選。專用儒學文吏。於取士之術。猶有所遺。乃奏增孝悌及能從政者爲四科。建和永壽間。試用諸生。大率以占第上下。通經多寡。限以三互。目生留闕。建寧間。試甲乙科。爭第高下。中有賄賂。改蘭臺漆書之經。以合其私文者。則詔諸儒讎定五經。聚筭篆隸鑄石于太學。謂之石經。有以也。科目昉于漢者若此。然士之出猶多以鄉人勸勉而恥急于自進焉。漢以降。魏雖有除限年之制。令郡國貢舉。勿拘老幼。儒通經術。吏達文法。則皆試用。古雖有除九品之請。復古鄉舉里選之法。祛今八損三難之弊。蕭齊取盈于五通。元魏求多于三清。卒之增年矯貌。拔擢奔競。浸成風。不可遏抑。良以貢舉者循名遺實。而應舉者務華絕根也。隋初。以志行修謹。清平幹濟之科。舉人。至煬帝好文詞。始置進士科。專詩賦取士。不復闕行能。貢舉之弊。弊無以復矣。唐仍隋。上郡歲舉三人。中郡二人。下郡一人。有才能者無常數。其由學館貢者曰生徒。由州縣舉者曰鄉貢。皆升于考功。而進退之。其科之目。曰秀才。曰明經。曰進士。曰明德。曰書。曰算。各依所習業。舉選以爲常。其天子自策舉之。曰制舉。以待非常之士。諸鄉貢懷牒自列於州縣試。已取文優者。長吏以鄉飲酒禮。會屬僚。陳俎豆。備管絃。牲用少牢。歌鹿鳴之詩。與耆艾敍長幼賓興焉。於是疏名列結。通保上戶部。戶部集閱。而闕考功。考功員外郎試其貢。舉校試之失者。皆有罰。初秀才科最高。試策五條。有上上中上中下。凡四等。後廢。而

進士科特重。然專之文辭。他制科名。如道侔伊呂。才膺管樂。志烈秋霜。文經邦國。辭標文苑。臨難不顧。徇節甯邦。長才廣度。沈跡下僚。樂道安貧。及賢良方正。博學宏辭等科。免絲燕麥。徒擁空名而已。貞觀間。詔加進士試讀經史一部。調露間。奏加帖經兼通老子孝經。永隆間。詔試文兩篇。識文律。然後試策。載初初。以策問貢人。數日方了。改試殿前。自此始。長壽間。令舉人獻歲元會。列于方物前。以備充庭。又製臣軌兩篇。貢舉習業。停老子神龍間。貢舉人仍習老子。停臣軌。開元間。司業李元瓘言。三禮三傳及毛詩尙書周易諸經。並聖賢微旨。生人教業。周禮經邦之軌。則儀禮莊敬之楷。模公羊穀梁。歷代崇習。今兩監及州縣。以獨學無友。四經殆絕。請令學生量配作業。貢人參試。又新注老子成。詔貢士減尙書論語策。而加老子。會考功員外郎不稱。爲士所詆訶。朝議以郎官地輕。移知貢舉於禮部侍郎。禮部選士自此始。天寶中。帝欲盡官天下材。命通一藝以上。咸詣京師。策之。相李林甫專恣。患草野士倨侮。得斥言其姦。請令尙書省先試。無一人及第者。而林甫以野無遺賢表賀。時中丞倚得幸。帝侍郎宋遙苗晉卿欲附之。以倚子奭爲羣首。羣議沸騰。帝召面試。奭手試卷。終日不成一字。遙晉卿坐貶官。其後有司鈎校。爭苛切爲公。水炭脂炬。饕餮皆士人。自將羅棘遮截。始唱名入列。坐廡下。士益浮賤。禮部侍郎楊綰患之。上貢舉議。大都以舉人幼而就學。止誦當代之詩。長而博文。不過諸家之集。遽相黨與。用宏虛聲。六經二史。皆同掛壁。投刺干謁。馳騫要津。無論孔門君子之儒。非所彷彿。卽漢之賢良方正。必不出此。請依古側席之求。罷今將牒之舉。縣令察孝廉。審舉其有孝弟忠信禮義之行。加以經業才堪策試者。以孝廉爲名。薦之州。州刺史禮待。

之。試其所通之經學通者上第。上之省。皆毋得輒自陳牒。其所習經周易毛詩儀禮周禮禮記左氏公穀。任科一經。務取深義。奧旨通諸家之學者。至京。遣諸司官有儒學者主試。每經問義十條。已對策。策三問。問古之治體及時務所施行者。全通爲上第。付吏部授官。經通八策。通二爲中第。與出身。下第罷歸。諸明經帖括非古制。請與進士並停。其國子舉人類此。左丞賈至議。大都以晉後衣冠遷徙。人多僑寓。於所在占籍。必舉之鄉。不足以盡材。請增國子博士員十道。及諸大州各設學。致生徒。其在桑梓者。鄉里舉之。在流寓者。庠序推焉。然終未俞行。丞相鄭覃請罷進士之科。李德裕稍殺進士之禮。蓋唐末進士科浮薄滋甚。誠如舒元輿言。進士科公卿大夫皆由此塗出。今有司坐舉子于寒廡冷地。比僕隸已下。非所以徵賢之意也。施棘園以截遮。是疑之以賊姦徒黨。非所以示忠直之節也。試甲賦律詩。是待之以雕蟲小技。非所以觀人文化成之道也。恐賢人君子遠去。不肯污辱爲國家用矣。貢舉委地。弊且不可收拾也。宋初一時風氣椎樸。人不知學問。不願仕宦。太祖置賢良。若經學。若吏理。凡三科。不限資。而郡縣無應令者。又許詣闕自薦。對策不稱。又詔察孝弟力田。若奇異。若文武。可任使者。具送闕召試。無可采。乃而後復重科舉。科制大都同唐。而進士科亦特重。又定諸州貢舉條法及殿最之式。而川蜀所貢士。令縣次往還。續食以示優。開寶初。進士及第中。有學士穀子邴。命中書覆卷試。且詔自今關食祿之家得舉者。悉以聞。中書覆試。其後學士防知貢舉。黜武濟川者。以召問語失次。且知爲防鄉人也。防亦以親試諸進士落第者數十人坐黜。始定進士廷試。本于唐載初之改殿試也。太宗時。天下稍習文。帝欲大興文治。每謂侍臣曰。朕

欲博求俊彥于制科。非敢望拔十得五。但得一二焉可矣。首設科。張齊賢在試中。顧不得第。于是并呂蒙正以下。並賜及第。賜宴袍笏。賜詩。賜禮記儒行篇。命各以優等授官。而進士恩禮之重不可上也。其後舉多覆試。哀十舉以上者。特賜出身。曰特奏名。八年始分甲。賜宴瓊林苑。雍熙二年。詔今有以文學往復與吏爲奸者。寘之于法。以經義相教者。元出科場。又御試得梁顥等。並唱名及第。淳化三年。知貢舉蘇易簡始命糊名。眞宗二年。以溫仲舒言。封印卷首。仍當日入院。又定廷試考第爲五等。上二等曰及第。三等曰出身。四五等曰同進士出身。八年。始禁秉燭。併制臚錄院易書。天禧間。舉人郭匡總麻喪。殿三舉。同保殿一舉。祥符間。以貢院舉人解衣閱視。慮挾藏書冊。謂失士體。欲止之。而挾書扶出者最多。得不爲禁乎。仁宗時。天下承平。進士額廣。士驚浮文。仲淹條議。舉人皆捨大方而趨小道。雖濟濟盈庭。而才識學行之士十無一二。請立州郡學。舉通經有道之士。專教授。俾務于興行明理。使人不溺于華藻。又請外郡科解。必履行無玷。藝業及等者。方許解薦。更不彌封試卷。其南省考試之人。已經本鄉詢考。方用彌封。于時所禁有七。而假戶冒名其二也。宋祁上議。詔州縣立學。須在學三百日。乃聽預鄉試。試三場。先策。次論。次詩賦。通考爲去取。而罷墨義。張方平知貢舉。又上言。設科選士。以文辭者。誠謂其懷道義於中。而英華外溢。叩其外而中之所蘊可質也。言而不度。將何觀焉。邇文格日失。其薦各出新意以相勝。朝廷屢下書戒敕。而學者罕能自還。今賦或八百字。論或千餘字。策或置所問而妄肆胸臆。驅扇浮薄。用虧雅俗。非取賢斂才。備治具之意。學士修知貢舉。亦大以爲患也。請寬期日。試士。試先策。擇其蕪鄙不通者罷去。留者就試已。

乃定其去留。其後御邇英。講周禮三年。大比州里。贊鄉大夫。廢興喟然曰。古選士如是。今率四五歲一下。詔故士有抑而不得進者。令間歲一貢舉。進士諸科減解額之半。增明經科。已復制科。如賢能方正。能正言極諫科。博通墳典。明於教化科。才識兼茂。明於體用科。詳明吏理。可使從政科。識洞韜略。運籌帷幄科。軍謀宏遠。材任邊寄科。又置高蹈邱園。沈淪草澤。茂材異等科。以待布衣之被舉者。治平中。議者以間歲歲貢士法不便。使士奔走道路。無休息。而不得游意于學。詔三歲一貢舉。定天下解額。取未行間歲法前四之三爲率。明經諸科毋過貢士之數。神宗初。王安石柄國。益厭唐詩賦取士之陋。欲一之于經術。乃言欲一道德。在修學校。欲修學校。在審貢舉。而貢舉之法不可以不變。今議進士科多得士。非其科法善也。士外此無繇進。故其中豈容無正直之賢士。少壯時。正當講求天下之義理。以經世。乃閉門學作詩賦。糜日月于空言。及其入官。於世務了無諳解。此科法敗壞。人才致不如古也。於是罷明經諸科。而進士科罷詩賦。各占治詩書易周禮禮記。兼以論語孟子。每試四場。初大經。次兼經大義十道。次論一首。次策三道。禮部試增二道。中書撰義式頒行。爲經義取士之始。視詩賦稍近實。主理義。而舉士不於鄉。不先於制行。士終祿利爲心。莫能反其本也。哲宗初。司馬光柄國。慨然欲盡官天下之材。乃請自今設十科以舉士。已又言神宗專用經義論策取士。復先王令典。但王安石不當以其一家私學。盡廢前聞而錮之。乃立經義詩賦兩科進士。於易詩書周禮禮記春秋內。聽習一經。初試經。次試賦。試詩。次論策。末試子史時務。凡專經進士。須兼習兩經。以四場通科其高下。又請升朝官歲各薦州郡經明行修士一人以聞。其預薦者。

不試州郡。禮部試不第。準特奏名。得廷試出身。其登第者。得升甲。風天下以敦士行。不專于文辭。正言劉安世又以祖宗重館閣。不輕授舉進士高第。及大臣薦舉。乃儲之禁密右地。博之古今典籍。優其廩餼。而不責之吏事。所以滋長德器。育成其輔弼之具也。望明詔執政。詳求文學行誼可長育者。召試以充。毋濫及非人。知貢舉蘇軾孔文仲以特奏名命官者。垂老無他望。布列州縣。惟務黷貨。無一思自奮而有聞于時者。願更加考選。仍限名額。毋使積弊。皆從之。於時積一治。按句疑有脫誤而紹聖崇甯盡焚燬以快忿。而其時達官貴胄多得第。上書獻賦頌者。又得第。閣梁師成用事。隸其家爲使臣。爲小吏者。畢賜第。蕪濫至甚。初祥符張士遜請主司親戚在進士中。明當引試。願出避嫌。詔自今舉人與試官有親嫌者。移試別頭。景祐賈昌朝請隨侍遠地。宜令運司類試。乃詔諸路有別頭試。咸平中。取士甚多。祥符中。取士甚少。嘉祐間。進士殿試不落一人。治平間。進士分四等。定三歲一舉貢舉。疇不謂曲盡其制。而不知弊至于宋。洵滔天而不可涯測矣。大抵自漢至隋。惟孝廉秀才之科。自隋唐至宋。惟進士明經之科。熙寧後。安石以經義試進士。則明經科廢而進士科獨行矣。進士輕于唐。重于宋。故今時稱宋進士爲將相科。有以也。□不知操觚末技。得以階榮進之路。則上所程者。惟詞章。下所習者。亦惟口耳。古選賢與能之意。無復存焉者矣。間有張九齡之剛直。吸噓雲雨。顏真卿之忠義。對越神明。陸贄之論諫。裴度之明哲。蘇易簡。王禹偁之知名。李沆。王曾之雅望。寇準之峭直。張詠之幹濟。蔡齊之威儀。韓琦。楊寘。范鎮之著節立身。固皆不媿科名。然韓愈名儒。何蕃義士。程頤理學。石延年豪舉。謂蓋代名流。不第者又不勝識。洵科主程詞。本同射覆。賢不肖

亦惟所中也。彼舉科場條貫投地而不取者，不有以哉。我高皇帝設科，廣求天下之賢，應文學者察言行，觀德考經術，觀業試書算，觀能策經史，時務觀幹濟，洪武元年下求賢詔。三年下開科詔。六年詔科舉取士終浮文，罷不設。十七年設科舉法，命禮部頒科舉新式行焉。已詔各布政司府州縣官舉秀才人材，蓋科薦並行也。十九年詔郡國經明行修之士，輪旌束帛，交馳于四方。初定金陵，辟儒士范祖幹、葉儀。既至，訪道祖幹，手大學以進，曰：「具不出此書。」克婺州，置行中書省，召儒士許元、胡翰等日會食，其中輪二人講經史治道，克處州，以書幣徵宿儒宋濂、劉基、章溢、葉深以來，命有司創禮賢館處焉。晚徵耆儒崇德鮑恂，上海全思誠、安吉余詮、高郵張長年，命坐顧問，命爲文華殿大學士，恂等固辭，乃賜勅禮遣之。時孝廉人材及郡縣所貢士皆得見，見稱旨，卽擢不次，而國子生奉命巡列郡廉官方吏治，問民所疾苦，還稱旨，卽擢用爲行省參政僉事知府等官。至有擢僉都御史者，已制科舉諸民。按民疑明之訛經宏詞等科並革，存進士科舉，與薦舉歲貢爲三途以並用。三年大比而賓興之，其會試中式士，天子御正朝制策策焉。又明日上具皮弁服，御正朝，文武羣臣具朝服，班侍臚傳，賜進士及第出身，同進士出身，各有差事，訖羣臣前拜賀，辭曰：「天開文運，賢俊登庸，卽六卿宣宣。」按下宣字疑衍制無是也。故進士科特重，其會試不中式者，送國子監肄業。俟又舉，文皇帝言國惟求賢以資治理，宵旰遑遑，急於飢渴，其令內外諸司於羣臣百姓中堪重任而沈滯下僚，堪劇煩而優游散地，抱道懷才而隱田野者，各舉所知，以名聞，毋媚嫉，毋蔽賢，毋徇私監舉。昭皇帝首申重舉官之令，謂天下之廣，豈無皋夔顏曾之徒，誠得一人，可勝千百，宜悉心訪之。已命國子生

有學者十六人。俾翰林嚴試。拔其尤。試六科。尋擢爲給事中。鄭府審理。俞建輔言。通賓與率馳騫于空。文眞才鮮少。有年未弱冠。卽登第入官。必有率意任情。而民受其弊者。令諸有司先審訪博古通今。行止端重。年二十五而上者。方許入試。比試。則務選其典雅切實者進之。會試益加重慎。大學士楊士奇言。北人文學遠不逮南人。然自古國家兼用南北士。請自今卷首書南北二字。如一科百人。南取其六。北取其四。則南北士皆登用矣。議定而上。賓宣德初。乃奏行著令。章皇帝踐祚。下求賢詔。出御製瀟蘭操招隱詩。賜大臣以風。大臣奏舉賢能官者。上爲降辭色慰藉。廷臣選慎無舉薦。降勅責。而司府州縣官亦各得舉賢良方正一人。上之部。已合臨御來三科進士試文華殿。拔其尤。授修撰編修評事等官。進學文淵閣。優待之。睿皇帝復辟。詔處士中有學貫天人才堪經濟。隱居尙志。不求聞達者。具以聞。肅皇帝入承大統。首言祖宗朝雖定科舉歲貢之法。而薦舉尤重。以並列于三途。自科舉法行。進士偏重。舉人無九卿之望。歲貢限方面之陞。田野絕保舉之路。以致人尙浮辭。不修實行。宜眞才之不可見也。務復科舉歲貢辟薦之舊。勅進士科文體毋浮冗。必古雅精確。制策往往親製。知人哲于放勳。顓俊勤于神禹。收攬人才。不啻拔十得五。其初政粹乎無議矣。後或倦勤。故崔銑有覆舉議曰。昔成周之世。聯之以比閭族黨。教之以德行道藝。正之司徒。升之司寇。六德爲本。六行爲輔。六藝爲翼。無奇袤岐。其心蕞爾之國。必有賢哲。教之效也。國家造士。專用經術。業易能。不假深造。仕易得。不俟大成。故士業經求仕。鮮以褻身舊法。里老保其行。試而升之學。再保其行。試而升之省。是猶里選之遺也。而久棄爲具文。是上憑科舉。曰付至公。故試而得士。

若博之中呼。其取之失人。若弈之遭負。何則。非有參驗之詳。觀考之素。可賴也。督學使者。數歲一至。事煩日寡。無裕于施教。故士以益荒。宜歲令縣令察舉。民年十五以上。能通四書及占一經。性行淳謹者。上之守而登之學。其輕狡者。雖才不右。督學官考校黜升之法。必本之性行。責之太守。審驗當否。而懲獎施焉。間有幸舉者。不延矣。陳建又言。項安世云。舉天下之才。而一之于科目。入是科者。雖饜養檣杙。必用。出是科者。雖周公孔子。必棄。宜朱子以爲教愈詳。取彌精。澄汰再三。而其具不越乎無用之空言。愈弊無益也。夫致治以賢才爲本。求才以興廉察孝爲先。經曰。居家理故治。可移于官。傳曰。求忠臣于孝子之門。此務本論也。李克曰。窮視其所不爲。貧視其所不取。此察廉方也。蘇軾顧諝之曰。上取孝。則勇者割股。怯者廬墓。上察廉。則敝車羸馬。惡衣菲食。苟可以中上者。無不用。夫上賢好德。人之秉懿。上好下甚。王治之大幾也。上誠敦篤。尚行爲天下先。而執此之政。如金石四時。堅久不易。則天下之士。爭自刮磨。舉人者。求無負于知人。舉於人者。求無負于所舉。縱其有好名徇私之流。殆其鮮矣。況好名而矯于善。不猶愈于好名而肆于惡耶。且天下固未有無弊之法也。然薦舉之取士也。擇而後用。其失也。一二科舉之取士也。用而後擇。其失也。八九。謂宜特設孝廉一科。取行著鄉閭。學通經史。博訪嚴試。優遇隆禮。並居詞科之上。庶乎人篤自修。而國有真才之用也。嗟乎。議者不乏。行者最尠。貢舉弊于今。殆甚于委地而滔天者矣。曷不率由舊章哉。



歷代武舉考

譚吉璉述

本館據學海類編
本排印初編各叢
書僅有此本

歷代武舉考

清 嘉興譚吉璉舟石述

古之爲學必取士。取士必以文武。其教養之法。出於一禮。曰：受成於學。出征執有罪。反釋奠於學。以試誠。告。詩曰：在泮獻囚。又曰：在泮獻馘。三代之學。文武豈二途哉。漢時隴西、天水、上郡、北地材官騎士。布滿郡國。高祖雖未嘗設科。而一時猛將。或出於餓隸黥徒。鼓刀販繒之賤。至武帝欲用文武。求之如弗及。於是衛青奮於奴隸。日磾出於降敵。漢之得人。于茲爲盛。元封五年。帝以名臣文武欲盡。乃下詔書曰：蓋有非常之功。必待非常之人。故馬或奔蹏而致千里。士或有負俗之累。而立功名。夫泛駕之馬。蹶弛之士。亦在御之而已。其令州郡察吏民。有茂才異等。可爲將相。及使絕域者。自是之後。成帝則詔北邊二十二郡舉勇猛知兵法者。平帝則詔郡國舉勇武有節。明兵法者。安帝永初中。詔舉列將子孫。明曉戰陣。任將帥者。建光中。又有武猛堪將帥者之舉。順帝則詔選剛毅武猛。有謀謨。任將帥者。靈帝則又詔舉明戰陣之略者。詣公車。科目非不詳矣。然卒未有得人如高祖之世者。唐又別立一科。謂之武舉。而進士武舉。遂兩立矣。武后長安二年。始置武舉。其置有長塼、馬射、步射、平射、筒射。又有馬槍、翹、關、負、重、身材之選。亦以鄉飲酒禮送兵部。元宗開元十九年。兩京諸路。各置太公廟。以張良配享。取自古名將。爲十哲七十二弟子焉。肅宗上元元年。追封太公望爲武成王。享祭一同文宣王。貞元二年。關播奏言。仲尼十哲。皆當時弟子。今

以異時名將列之弟子。非類也。乃去十哲之名。自是始有武學。而唐之選舉志。以武舉始於武后之時。其選法不足道。故不詳書。然以武舉異等中第。如郭子儀者。遂成再造之功。烏可言其不足道耶。然按薛謙光言。武能制敵之科。祇令彎弧。夫趙雲雖勇。資諸葛之指揮。周勃雖雄。乏陳平之計略。若使樊噲居蕭何之任。必失指蹤之機。是選將不取于弓馬。有斷然矣。武舉卽此科之意。故當時皆非之。宋太祖初幸武成王廟。觀兩廊名臣繪像。指白起曰。此人殺降不武之甚。以杖畫之。後修武成王廟。令張昭寶儀詳定配享功臣。并吳起、孫臏、廉頗、韓信等二十二人。不克令終者。竝退之。復升灌嬰、耿純輩。開寶元年。上令諸道解武舉者。命李昉、扈蒙試問所習業。皆無足取。悉令罷之。仁宗朝富弼言。應制科者。必樂爲賢良方正。才識兼茂。恥爲將帥邊寄之名。蓋今人重文雅而輕武節也。臣請詔近位及藩鎮。于文武官中。各舉明兵法。有威果習練武略。堪任將帥者。一二人。以獻。蘇洵上書。請復武舉。使兩制各舉所聞。有司試其可者。而陛下親策之。權略之外。便于弓馬。可以出入險阻。勇而有謀者。不過取一二人。待以不次之位。試以守邊之任。則人材出矣。天聖八年。親試武舉十二人。先閱其騎射。而後試之。慶歷二年。詔兩制舉文武官各一員。爲武學教授。三年。詔罷武舉一科。言事者。以文武竝用。廢一不可。宜復此科。分爲三等。上等取其學識深遠。策對優絕。次等取其策對優長。騎射兼有。下等取其擊拋刺射。翹傑魁俊。量能而官。因材而任。時蘇軾策有曰。今夫孫吳之書。其讀之者。未必能戰也。多言之士。喜論兵者。未必能用也。進之以武舉。試之以騎射。天下之奇才。未必至也。然將以求天下之實。則非此三者不可以致。如以爲未必然。而棄之。使天下之士。

不復以兵術進亦已過矣。司馬光言奉勅考試武舉。法當先試弓馬。若合格卽試策略。弓馬乃選士卒之法。非所以求將帥者也。不幸而不能挽強馳突。則雖有策略將帥之材。不得預試。恐非朝廷建武舉之意。自今欲乞試策弁挽弓及靶者。皆聽就試中書。如舊制。命如所請。于是詔舉人先試以孫吳大義。以策爲去留。以弓馬爲高下。高宗紹興時。上以閣門祇候趙應熊試弓馬文字。皆有可採。真有用之材。擬擢用之。湯思退曰。應熊初入仕。且以帥司準備將處之。以養資望。上從之。自是武舉齋公據赴部引驗。于行在殿前。司試弓馬訖。就淮南轉運司別場附試程文。紹興十六年。乃定武士弓馬。及選試去留格。孝宗卽位。創制武舉。二年。上御射殿。進士第五甲。及特奏名。按射。上顧行間。有黎華者。以其人物服飾似壯士。射亦閑習。宜略與旌別。乃傳旨。黎華可特免銓試。與注黃甲。差遣。上又曰。自此須立規則。令將帥稍知書曉文學。禁衛出身。如光武故事。令習孝經。使文士能射。御武士知詩書。庶幾文武合一之道。乾道五年。詔依文舉給廣牒。同正奏名。榜首賜武舉及第。餘竝賜武舉出身。後又以授官與文士不類。詔自今補授。皆做進士甲科恩例。後又以文舉狀元例除館職。亦召武舉榜首爲閣門舍人。立國子額。收補武臣親屬。其文臣親屬願赴武補者亦聽。嗣是太學諸生久不第者。去從武舉。已乃鎖廳應進士第。皆換京秩。以林穎秀言。武士舍棄弓矢。更習程文。褒衣大袖。專效舉子。夫科以武名。而不求雄健喜功之士。徒啓其僥倖名節之心。于是詔自今毋得鎖換侍御史。胡沂又言。祖宗時試中武藝。竝赴陝西任使。或除京東捉賊。或三路沿邊。試其効用。或于經略司教押軍隊。準備差使。今所取非所用。所用非所學。請取近歲中選人數。量其才品。

高下。考任深淺。授以軍職。使之習練邊事。諳曉軍旅。從之。甯宗時。仍復武舉。鎖換法。理宗淳祐四年。上御後殿。閱武舉進士射。後以邊塵未靖。備禦方嚴。令內而侍從臺諫。兩省卿監郎官。外而監司帥守。各舉曉暢兵機。練習邊事。材略卓然可用。以備任使。則知武舉一途。固不足以盡天下貔貅之士矣。

明初立法教養。有武學科目。有武舉黜陟。有武選。始之所用。世蔭爲多。至天順初。石亨奏言。國家設法推武舉。職誠當矣。然通于兵法者。止是記誦之學。熟於弓馬者。不過匹夫之勇。臨敵制勝。未必皆得其用。況人之智謀在心。未曾試用。莫得而知。所以漢唐以來。皆設軍謀宏遠。知識絕倫等科。令其各陳所能。應詔如趙充國。以良家子應募。郭子儀以武舉自進。設使當時拘于保舉。豈能得二人之用哉。今後乞許其自陳。起取試驗。果有可取。令於各邊總兵官處謀議。果能措置得宜。有功效。然後不次陞擢之。則得實才爲國爪牙矣。英宗善其言。命兵部凡有舉薦。及自陳者。具名奏聞。成化十四年。太監汪直請武舉設科。鄉會殿試。悉如進士恩例。下兵部集議。于是兵部議上武舉科條。大略鄉試以九月。會試以三月初。場試箭。二場。試論判。三場。試策。殿試以四月一日。賜武舉出身有差。宏治中。兵部尙書劉大夏上疏。上言曰。武舉之設。將以延攬英雄。廣儲將帥。招徠韜略之士。收拾跡弛之才。且天之賦人以才。詘于文者。或優于武。亦不以遠而畜。不以賤而限。如穰苴生于寒微。吳起困于羈旅。樂毅出于疏賤。黥布雜于輿臺。衛青辱于人奴。去病育于假子。若當時非有知識之人。爲之汲引。豈能自致通顯。建功于世。而垂稱于後耶。昔唐知求將之爲重。視進士科而增置武舉。遂得郭子儀。卒成再造之功。宋知求將之爲重。視制科而詳定武舉。遂得

狄青令狐挺卒能料元昊之背叛破智高之猖獗蓋異人傑士感奮而興飲氣挾術以赴功名之會此前代故事有足徵也蓋事既當重則品式宜加詳備恩禮宜從優厚今欲依倣唐宋故事參酌會殿二試事例少加損益于是詔次年四月開科初較騎射以發九矢中四矢爲合式次較其步射以發九矢中二矢爲合式三試策論其策論或據古兵法或問時務優者列職論官以示崇異其非全材黜之以俟後舉其兩京鄉試照先年團營武舉例兵部官出題在外俱巡按御史出題正德時以兵部侍郎既知武舉會考難以再典武舉鄉試于是兩京應試亦送各該御史考試類送兵部如曾經三次御試中式者免其再試與新科鄉舉之人一體赴京會試穆宗時詔武場畢後其不中之人通行考驗有智勇可取及精通一藝者咨送邊鎮軍門充爲名色把總領軍教練但係訓練有成與武舉一體推用或在營教練無成不肯向上者督撫竟自革回是又于武舉之中稍爲通變者也



貢舉敘略

陳彭年編

本館據學海類編
本排印初編各叢
書僅有此本

貢舉敘略


宋 南城陳彭年永年編

三代貢舉之制。始於鄉大夫。其升於司徒曰秀士。升於太學曰俊士。升於司馬曰進士。然則鄉大夫暨於司馬。皆貢舉之官也。秦之制無聞焉。漢高祖始詔御史中執法。下郡守勸勉賢者。詣相國府。署行義年。文帝詔諸侯王公卿郡守舉賢良能直言極諫者。元帝又詔丞相御史舉質樸敦厚遜讓有行。又詔列侯舉茂才。又舊儀御史二千石察舉茂才尤異。此則漢之諸侯王丞相御史九卿列侯刺史郡守皆有舉士之制。而丞相之府實司其事。武帝令太常籍博士弟子有秀才異等。輒以名聞。又光祿勳銓第郎吏。歲舉秀才廉吏。此則太常光祿勳別有舉士之制也。至成帝初置尚書常侍曹。主公卿。又置二千石曹。掌郡國二千石。則尚書主選舉之始也。後漢三公將軍光祿勳廷尉司農中二千石司隸州牧。歲舉茂才廉吏。郡國歲舉孝廉。三公上尚書。輒勞其後將。又大學試明經弟子。此與西漢之制略同。其後改常侍曹爲吏曹。亦曰選部。又公府西曹主府吏置用。東曹主二千石長吏選除。於時選舉之制於郡國屬功曹。於公府屬東西曹。于尚書屬吏部。而尚書令僕總之。魏司空陳羣以爲天臺選用不悉人才。每郡擇有鑑昭者。除爲中正。自狀人才。澄汰九品。又置州都總其事。應璩所謂百郡立中正。九州置都士。又吳亦有大公平。若魏之州都。而蜀無聞焉。晉宣帝除九品州。置大中正。大中正之職。掌訪問鄉邑。考績德行。以定上格下格。選平

正無禮。立貶清議。晉令大小中正爲內官。聽月二會議。上東門外。州及郡國亦舉孝廉秀才。其在天臺則吏部。州則別駕。西曹。郡國則功曹。主其事。宋齊亦如之。而宋文帝不欲重權在下。故分置二吏部。尙書以散其權。梁無中正。天監中。州置州望。郡置郡宗。鄉置鄉豪。各一人。專典搜薦。無復膏粱寒素之隔。普通七年。又詔州郡歲舉人。敬帝復令諸州各置中正。選舉皆中正。押上。然後量試。不然則否。陳亦如之。後魏州郡皆有中正。掌選舉。每以季月。與吏部銓擇可否。其秀才對策。居中上。表敍之。崔浩爲冀州大中正。薦冀定。相幽。并。五州士數十人。各起家爲郡守。自太和以前。精選中正。德高鄉國者充之。其邊州小郡。人物單尠者。則併附佗州。其在僻陋。則闕而不置。當時稱爲簡當。頗曰得人。及宣帝孝明之時。州無大小。必置中正。旣不可悉得其人。故有番落庸鄙操銓覈之權。而選敍頽紊。正始初。乃罷諸郡中正。而吏部之職。皆如往制。北齊選舉。亦沿後魏。凡州縣皆置中正。中書策秀才。集書策貢士。考功策廉吏。天子常服乘輿。坐朝堂中楹。秀者各以班草對。字有脫誤者。呼起立席後。事有濫劣者。飲墨水一升。文理孟浪者。奪席脫容刀。孝昭帝孝建二年。詔內外執事官。每三年之內。各舉一人。居白屋巾褐未釋。亦舉之。後周初。蘇綽爲六條詔書。其四曰擢賢良。懲魏齊之失。罷門資之制。其所察舉。頗加精慎。武帝平齊。詔山東縣舉明經幹理。宣帝亦詔州舉高才博學者爲秀才。郡舉經明行修者爲孝廉。依六官之制。建吏部中大夫。掌選舉。小吏部下大夫一人。以貳之。隋開皇七年。制諸州歲貢士。十八年。又詔京官五品已上。總管刺史。以主行修謹。清平幹濟二科舉人。皆吏部主之。初漢魏之郡佐史。皆刺史二千石辟署。北齊多繇中用。故州辟郡士之權。

移於朝廷後周復遵古制及隋皆歸吏部故朝廷貢舉之制盛矣唐循隋制諸郡貢士常貢之科有秀才
有明經有進士有明法有明書有明筭自京師崇文館國子監郡縣皆有學焉每歲仲冬國子郡縣課試
其成者長吏會屬僚設賓主陳俎豆備管弭牲用少牢行鄉飲酒歌鹿鳴之詩徵耆艾敍少長而觀焉就
錢而與計偕其不在學而舉者謂之鄉貢至尙書省始繇戶部集閱而關於考功課試可者爲第武德舊
制以考功郎中監試貢舉貞觀以後則考功員外郎專掌之武后延載元年策問貢舉人於雒城殿前試
貢舉人自此而始長安二年又教人習武藝每歲如明經進士之法行鄉飲酒之禮送於兵部明皇開元
二十四年制令禮部侍郎專掌貢舉初因考功員外李昂詆訶進士李權文章大爲權所凌侮朝議以郎
官地輕故移於禮部又詔應試進士第唱第訖具所試送中書門下詳覆是年始制禮部貢舉印其後禮
部侍郎闕人亦以佗官主之謂之權知貢舉其知貢舉者皆朝廷美選二十九年京師又置宗元館諸州
置道學生有差道學生謂之道舉課試與明經同先是掌貢舉官親族皆於禮部差郎官考試有及第者
尙書覆定及第者仍別奏謂之奏移送吏部令考功員外試練侍郎覆定及第者仍別奏謂之別頭舉人
代宗永泰元年始置兩都貢舉禮部侍郎官號皆以兩都爲名每歲兩地別所及第至大歷十一年停東
都貢舉德宗貞元十六年又罷別頭舉人文宗太和元年又權於東都置貢舉又有制詔舉人皆標其目
而搜揚知之志烈秋霜詞殫文律抱器懷能茂才異等才膺管樂道侔伊召賢良方正軍謀宏遠明於體
用達於吏理之類始於顯慶盛於開元貞元皆試于殿廷乘輿親臨觀之試已糊其名於中考之策高者

特授美官。其次與出身。又有吏部科目。曰宏詞拔萃。平判官。皆吏部主之。又有三禮、三傳、三史、五經、九經、開元禮等科。有官階出身者。吏部主之。白身者。禮部主之。其吏部科目。禮部貢舉。皆各有考官。大抵銓選屬吏部。貢舉屬禮部。崇文館屬門下省。國子學生屬國子監。州府鄉貢屬長官。職司在功曹司。功五代因之。夫以賢爲寶。得士者昌。聖賢之談。邦國之制也。貢舉之設。王政攸先。方冊所傳。舊章不墜。或有公直以馳譽。精識以知名。不徇乎朋家。咸求乎藝實。故能若水鑑之鑒。衡石之平。增臺閣之輝。副文儒之望。亦有昧於遠體。拘乎小節。或鄭雅而靡辨。或涇渭而共流。以公器而徇私恩。採虛聲而損至學。俾白駒以興刺。使嘉魚而絕詠。斯爲蠹政。良足慨已。



科場條貫

陸深撰

本館據紀錄彙編
本影印初編各叢
書僅有此本

紀錄彙編卷之一百三十六

科場條貫

陸深

陸深

洪武十八年令會試主考官二員同考官三員臨期具奏於翰林院官請用其餘同考五員於在外學官請用

本朝鄉試用子午卯酉年會試用辰戌丑未年惟前癸未年因太宗渡江用明年甲申會試天順癸未科場災至秋復試以明年甲申殿試

會試

會試錄亦稱小錄見於正統七年禮侍王英前定是
年同考則有永新縣知縣陳負韜京衛武學教授
紀振俱進士岐陽縣教諭彭舉彌封臈錄對讀官
俱用部屬中式十二名李森都察院吏三十三名
南昱刑部吏一百廿一名鄭溫松陵驛驛丞
十年同考則有吏科給事中候潤一教授二教諭是
歲中式者無他流

十三年侍講杜寧爲副考官同考有二教諭一訓導
有辦事官舒庭謨中一百二十五名

景泰二年知貢舉官胡濙楊寧俱禮部尚書副考官

脩撰林文同考則有刑部主事錢博廣東叅政羅崇本一教授一學正一訓導

五年考試官商輅輅正統十年進士閱三科爲正考官已至兵侍兼翰林學士春坊大學士同考則侍講兼中允楊鼎贊善兼檢討錢溥皆已未進士先一年奏准會試考官翰林春坊專其官京官由科第有學行者兼取以充是年郡縣教職爲同考者絕矣而受卷彌封對讀官則用知縣知州等官爲之

天順元年副考呂原通政司右叅議兼侍講同考錢

溥尚寶司少卿兼編脩李泰尚寶司丞兼編脩是時英廟復辟官制更改徐必以翰林典籍爲房考彌封官則用府同知矣

四年閻禹錫以國子學正爲房考

七年科場火移于秋試是科五經刻文三篇論刻二道文盛於是矣

成化二年供給官則用禮部精膳司員外張顯矣五經亦刻三篇第二場刻詔

五年每歲翰林同考敘官同陞者序科是歲惟周經以庚辰序於丙戌之後

八年科場條貫畧定矣

十一年編脩林瀚敘於己丑之下

十四年同考則有行人司右司副張祥

廿二年尹閣老直主考序稱宣德丁未大學士楊士
竒議會試取士分南北卷北四南六旣而以百乘
除各退五爲中數是年從言者又各退二卷以益
中數云

舊制俱以八日鎖院至成化二年裁定以二月七日
鎖院唯弘治五年以郊祀齋命先一日蓋六日云
洪武十七年頒行科舉成式會試同考八人

正德六年劉閣老忠主考序云舊制五經同考總爲十四人近以易詩卷浩繁各增一人爲十七人據正統元年才八人至景泰五年增二人爲十人天順四年又增二人爲十二人成化十七年又增二人爲十四人

洪武三年庚戌始開科取士士之就試者一百三十三人中式者七十二人主試則御史中丞劉基治書侍御史秦裕伯同考則翰林侍讀學士詹同弘文館學士睦稼起居注樂韶鳳尚寶丞吳潛國史宋濂而序出於濂八月京畿鄉試會試合河南陝

西北平山東山西江西湖廣浙江廣東廣西福建
十一省之士而高麗之士亦與焉就試之士二百
中式者百二十人而景濂復爲分考復爲之序

弘治七年始命小錄中考試等官不許稱張公李公
洪武十七年始頒行科舉定式三年大比各次年會
試鄉舉猶未限名也吏胥不許應試則在四年之

詔

永樂十五年兩京始命翰林春坊官主考

景泰元年令鄉試同考用五人專經考試

洪武辛亥秋八月京畿鄉試兵部尚書吳琳國子司

業宋濂爲主試其受卷膽錄對讀彌封等官皆廷
臣云



略 考 科 學

編 昌 其 董

本館據學海類編
本排印初編各叢
書僅有此本

學科考略

明 華亭董其昌思白編

學

帝舜始建學養老。養國老於上庠。庶老下庠。周制。天子之學曰辟雍。諸侯之學曰泮宮。通典曰。漢文翁爲蜀郡。修起學宮。天下皆立學。自文翁始。

孔子廟

後漢鍾離意爲魯相。身入孔子廟堂。蓋孔氏家廟也。唐志曰。武德二年。始詔國學立孔子廟。正觀四年。又詔州縣皆作。

配坐

唐元宗始改顏回等爲坐像。始詔孔門弟子從祀。前此孔子坐而諸賢皆立。弟子惟列像廟堂。不預享祀。

配享

舊制釋奠於太學。周公爲先聖。孔子爲先師。配享。房元齡奏唐太宗。罷周公祀。始以孔子爲先聖。顏子爲先師。配享。

先賢配

唐會要曰。正觀二十年。詔以左邱明等二十一人。竝令配享尼父廟堂。此其始也。

孔子封

唐會要曰。開元二十七年。追諡孔子爲文宣王。宋大中祥符五年。追諡至聖。元加諡大成。云大成至聖文宣王。國朝因之。至嘉靖間。始改先師孔子。

孔父母

宋大中祥符元年。勅叔梁紇宜追封齊國公。顏氏追封魯國太夫人。又勅孔子妻亓官氏。追封鄆國夫人。元始封孔父母爲啓聖王夫人。

十哲封

唐開元二十七年。詔十哲竝宜褒贈。顏亞聖封兗公。閔子費侯等是也。又詔七十子竝宜追贈。曾參贈成伯。顓孫師陳伯是也。

太公廟

唐高宗追封太公望武成王。元宗置太公廟。以張良配享。簡古名將準十哲。德宗以張良、田穰苴已下十人爲十哲。孫臏、范蠡以下七十二人爲弟子。

賢良

漢唐逮宋。取士之制。有賢良方正茂才異等六科。謂之制舉。亦曰大科。通謂之賢良。其制蓋自漢文帝始。

秀才

漢世取士。又有孝廉秀才二等。齊宋以來。州有秀才之舉。隋唐之代。其科最上。貞觀中。有舉而不第者。坐其州長。由是其科廢。故自唐及宋。雖進士猶以秀才爲號。自漢唐之舊也。

明經

漢始以明經射策取人。以通經多寡。補文學掌故。唐置明經之科。開元中。崔元瓘上言。問大義十道。時務策三道。宋朝定業五經義三十道也。

學究

唐取士之科。有明經。有進士。有明法。有九經。有五經。有三經。有二經。有學究。爲舉之常選。學究設科。自唐始也。宋神宗以經術與三舍始除之。

處士

史記。伊尹於湯。致於王道。曰。伊尹處士。湯迎之。五反然後往。此名處士之始也。

武舉

唐武后詔天下諸州。宜教武藝。每年準明經進士貢舉例送。此武舉之始也。

貢士

周禮大司徒。邦國舉賢者於王。則貢舉之始也。唐武德初。諸州號明經俊秀。州縣試取合格者。每年月隨

方物入貢。武后時。劉承慶疏。伏見比來天下所貢物。至元日皆陳在御前。唯貢人獨於朝堂拜。恐所謂重物輕人。請貢人列方物之前。從之。此貢人羣見之始也。國朝令各府學。每歲貢一人。州學三歲貢二人。縣學二歲貢一人。成化二年。從大學士李賢之請。衛學每歲貢一人。以先入學者。提學試而充之。

科舉

周有鄉舉里選。國朝洪武四年。詔各省連試二年。自後三年一舉。凡遇子午卯酉年八月。則京畿各省舉鄉試。辰戌丑未二月。則禮部舉會試。

三場

前漢貢士惟射策。梁陳尙詞賦。唐初并試雜文。元宗舉人。問策外更試賦。并雜文貼經。爲三場試。按雜文今論是也。宋神宗以經術取士。詞賦遂罷。國朝鄉試八月。會試二月。俱以初九日爲第一場。四書義三道。五經義各四道。十二日爲第二場。試論一道。詔誥表内科一道。判語五條。十五日爲第三場。試策五道。

印卷

後唐明宗勅舉人試前五日。納試紙。用中書省印。印訖。付貢院。國朝鄉試卷。用各省布政司印。會試卷。用禮部印。

席舍圖

宋祥符中。試前一日。貢院始出榜曉示。逐人排坐位處。所謂之坐位榜。亦謂混榜。國朝鄉試爲席舍圖。用

紙裝二軸圖東西坐行以千字文編號注各生姓名鄉貫經義會試亦同。

鄉貫

唐元宗勅諸州貢舉皆於本貫不得於所在附貫國朝鄉會試卷首書各生年甲籍三代。

印題

宋仁宗親試進士於崇政殿內出三題摹印以賜國朝鄉會殿試題紙皆摹印徧賜。

彌封

唐武后以吏部選人多不實乃會試日自糊其名暗考以定等第宋貢舉發解皆用其事曰彌封國朝鄉會試場內俱設彌封所委官以主之。

巡綽

宋雍熙二年詔禮部引試分差官廊察視視勿容私自授受初以檢示九經諸科至景德中爲巡試鋪天聖中始有巡鋪官國朝鄉會殿試皆用武職爲巡綽官。

監門

宋雍熙二年詔禮部試九經諸科輪番差官二人在省門監守此試院監門之始也。

知舉

隋唐貢士皆考功主試開元中考功員外郎李昂爲舉人誣詞元宗以員外望輕遂移貢舉於禮部以待

郎主之國朝鄉試。巡按御史聘外省教官會試。禮部請翰林官主試。

會試

國朝北京會闈。始於永樂乙未。洪熙元年。定南北中三卷以取士。

進士

周大樂正論造士之秀者。以告於王。而升諸司馬。曰進士。隋大業中。始置進士之科。國朝令天下舉人。會試中式。則殿試。賜進士。

放榜

撫言曰。進士榜頭。立粘黃紙四張。以氈筆濡墨。滾轉書禮部貢元四字。或曰。文皇親以飛白書之。

殿試

漢文帝親策賢良。能直言極諫者。此後世人主。親策士之始。唐武后策問貢人於洛城殿。殿前試人。自此始也。宋仁宗始詔進士殿試。不黜落。國朝皆因之。常制以辰戌丑未年。洪武癸未。太宗渡江。天順癸未。貢院火。皆以其年八月會試。明年三月殿試。於是二次有甲申。正德庚辰會試。因武宗南狩。次年今上登極。殿試亦有辛巳。

分甲

宋太宗御崇政殿試進士。詔糊名考校。定其優劣爲五等。第一至第二等。賜及第。第三第四。賜出身。第五

賜同出身。仁宗始曰甲國朝第一甲。賜及第三人。二甲賜出身。三甲賜同出身。

唱名

宋太宗御崇政殿試進士。梁灝首以程試上進。帝嘉其敏速。以首科處焉。按名二呼之。面賜及第。唱名賜第。此其始也。

及第

漢之取士。其射策中者。謂之高第。隋、唐以來。進士諸科。遂有及第之目。

釋褐

宋太宗賜新及第進士諸科。呂蒙正以下。綠袍靴笏。非常例也。御前釋褐。蓋自此始。

賜宴

宋太宗賜新及第進士王嗣宗等錢百千。令宴樂。太宗親試呂蒙正以下。竝賜及第。仍賜宴開寶寺。此賜宴之始也。其後賜宴於瓊林苑。自此爲定制。摭言曰。曲江遊賞。雖云自神龍以來。然盛於開元之末。瓊林賜宴。亦唐曲江杏園之事爾。國朝賜恩榮宴於禮部。

題名

嘉話錄曰。慈恩題名。起自張莒。本於寺中閒空。而題其同年人。因爲故事。摭言云。神龍以來。杏園宴後。皆於慈恩寺塔下題名。宋制進士中第。賜名於桂籍堂。國朝於國子監立石題名。按古今詩話題名始於唐韋肇

謁先師

唐咸通中。劉允章爲禮部侍郎。請諸生及進士第。竝謁先師。則茲禮起于唐懿宗之世。劉允章之請也。又遷舉志曰。開元五年。始令鄉貢明經進士見訖。國子監謁先師。是則開元之禮。第施於貢士。而允章所請。糾開元貢士之禮。而爲之制也。

登科記

唐會要曰。宣宗大中十年。禮部侍郎鄭顯。進進士諸家科目記十三卷。勅自今後。於榜訖。仰寫及第人姓名。仍付所司。逐年編次。摭言曰。永徽以前。俊士秀才二科。猶與進士竝列。咸亨後。由文學舉於有司者。競集於進士。由是趙儻刪去俊秀。故目之曰。進士登科記。其事殆疑自唐初。獨以進士登名記。起於高宗時。趙儻國朝有進士登科錄。



臚傳紀事

繆彤著

本館據學海類編
本排印初編各叢
書僅有此本

臚傳紀事

清 吳郡繆 彤念齋著

二月初九日第一場坐淡字號。初十日卯刻大風出貢院門。有旗下小廝牽予裾云。新科狀元來了。吾家裏人都要出來看。予頗異之。亦不解其故。十二日第二場坐珠字號。夜夢外祖語予曰。吾掌海中珍寶。予叩曰。珍寶誰爲第一。外祖云。飛錢爲第一。又以牙笏授予。二十六日榜發。中式三十六名。予寓報國寺西廊第一房。丁酉八月。在此舉鄉試。丁未復至此舉會試。未發榜前一兩日。予心快快。遂束裝作歸計。二十五日至殿前古松下默祝云。公車五次。今科不中。以後不作進取想。竟與松長別矣。又與三弟及寺中同寓黃繼武馬殿聞輩作別後。遂出寺門。往張家灣行里許。遠見一人騎而來。兩手抱金字牌二。有狀元及第四字。忙向彰義門走。與予騎交臂過。予在馬上回顧。又有假滿還朝四字。予心疑焉。過同郡汪茗文寓別之。因問頃所見者。必史及超。徐公肅嚴就思。三先生進京。茗文云。三公無一來者。予豈夢見耶。適邵無盡李經園與星士方伯瞻在座。談星學。茗文亦自負精于星理者也。索予造觀之。予急欲至張灣。遂別去。是日僅至海岱門外許家店宿。二十六日早榜發有名。仍歸報國寺。予至松下長揖謝之。三月二十日殿試。禮部儀制司員外俞有章唱名。名數單者從左掖門入。雙者從右掖門入。予三十六名當在右。由貞度門至太和殿前。行三拜九叩頭禮。內院官置黃棹于丹陛。卽擡下丹墀。禮部散題紙。諸進士跪受。又行

三叩頭禮。然後就坐。讀卷官十四員。爲大學士巴泰、李蔚、學士明珠、劉秉權、劉芳躅、田逢吉、吏部左侍郎馮溥、右侍郎王清、都察院左都御史王熙、禮部左侍郎黃機、戶部左侍郎嚴正矩、禮部右侍郎曹申吉、兵部左侍郎劉鴻儒、刑部左侍郎馬紹曾。二十一日到禮部。領三枝九葉帽頂。宿鴻臚寺。二十二日五鼓入廟。至午門候傳臚。是日微雨。

皇上升殿時。雨稍甚。先一日傳某人狀元。某人榜眼。某人探花。彤已無望。不過隨班行禮而已。及至太和殿前。與諸進士跪丹墀下。聽三唱第一甲第一名。係彤名。每一唱已。必鼓樂良久。彤心中猶疑非是。不敢出班。禮部官掖之前。然後出班跪。跪稍遲。傳制官已唱第二名。糾儀御史于次日疏云。第一名繆彤未跪。卽唱第二名張玉裁。傳制官應聽處分。奉

旨罰俸三個月。良以書生未習。

朝儀。因累執事官。于心甚不安也。是日唱名畢。行三跪九叩頭禮。彤隨禮部堂上官。捧黃榜。從

御道出。跪至龍亭內。鼓樂迎至東長安門。張掛順天府府尹李天裕。府丞高爾位。迎彤與張玉裁、董訥等三人至廠內。簪花酌酒。用儀從迎至順天府赴宴。先望

闕叩頭。府尹府丞率僚屬對立。行四拜禮。然後就席。彤坐正席。榜眼探花左右坐。俱南向。用教坊樂。徹席。望

闕謝恩。府尹府丞親送至寓。寓中設席款之。二十四日。同張董兩同年來謝。

恩表。舊例前科狀元代作。所以尊前輩。以其知體式也。甲辰科狀元嚴就思先生。給假歸去。而已亥徐立齋乙未史立菴兩先生。皆在籍。應求前科榜眼探花。而李貞孟吳長庚兩先生。亦在籍。惟辛丑榜眼李子靜先生在任。彤與張董兩同年。登堂求見。投門生帖。用贊儀二十四金。賞長班管家銀八兩。俱照例也。是時鼎甲中最資深者金沙蔣虎臣先生。係丁亥探花。因己丑有熊次侯先生。戊戌有孫惟一先生。皆在任。虎臣先生云。李子靜應讓孫惟一。孫惟一應讓熊次侯。熊次侯應讓不佞。不佞代求李子靜。此乃衙門之體。一時前後輩俱歎服蔣先生之言良是。二十五日到禮部。與恩榮宴。讀卷官自滿漢大學士以下。收卷官掌卷官自翰林科部以下。監試御史及巡緝供給各官俱與宴。

皇上遣內大臣佟國舅陪宴。彤一席。榜眼探花一席。諸進士四人一席。用滿洲桌銀盤菓品食物四十餘品。皆奇珍異味。極天廚之饌。

御賜酒三鼎。甲用金盃。隨其量盡醉無算。宮花一枝。小絹牌一面。上有恩榮宴三字。狀元用銀牌。四月初二日午門外。賜彤袍帽。水晶金頂涼帽一頂。鑲蟒石青朝衣一件。玳瑁銀帶一條。荷包牙筒刀子俱全。馬皮靴一雙。當時更易。率諸進士行三拜九叩頭禮。榜眼探花以下。俱折鈔五兩。初六日著。賜袍入朝。親捧謝恩表。跪丹墀下。內閣收進。匣用黃綾包。用銷金龍袱。初七日。國子監釋褐。鴻臚寺官引彤至先師神位前。行釋菜禮。奠三爵。及四配伏位。次引榜眼探花至十哲神位前。東西分奠爵伏位。引二甲第一名奠東廡。三甲第一名奠西廡。伏位。同行禮畢。至彝倫堂拜大司成。大司成坐正位。在本監中式者。行

四拜禮。餘俱兩拜。大司成請鼎甲上堂酌酒三杯。鼓樂送出。二十日吏部引見。二十二日奉旨授彤祕書院修撰。張玉裁董訥俱授編修。二十四日吏部宣旨二十五日入

朝謝恩。至內院見滿漢大學士行一拜三叩頭禮。舊規兩拜六叩頭。大學士受一答一。今滿洲大學士省答拜之禮。止行一拜禮。見學士二揖。卽出。二十八日同張玉裁董訥到任。先謁孔廟。次謁土地祠。土地神爲韓昌黎先生。謁畢卽至內院報到任日期。典籍移咨吏部開俸。是日選庶吉士二十九日奉

旨帥顏保范承謨教習庶吉士三十日到教習老師處投帖。五月五日大會同館諸同年于金魚池。十五日到內院請進館日期。問大學士親自送否。如親送則設席多。不親送設席少。大學士李公問范老師。范老師又問諸門生自酌定可也。李公云此衙門大典禮。自辛丑

世祖章皇帝賓天故不行。甲辰應行而不行。今科不行。此禮必廢。但今科鼎甲三人。庶常十二人。多寒士。此舉甚費。如何。十九日早齊赴翰林院投教習老師請啓。以次投中堂各前輩啓。二十六日進衙門。午時候教習老師大到任。三鼎甲與諸庶常迎老師于二門外打躬。老師進後堂。諸同年拱立聖廟前。候老師同行。二跪六叩頭。次至土地祠。同老師行一跪三叩頭禮。入川堂。兩位老師交拜。卽坐川堂。是爲丹地深嚴。鼎甲庶常左右分班。彤領左班。次董訥。次史鶴齡。次夏沅。次丁蕙。次謝兆昌。次唐朝彝。次劉澤溥。張玉裁領右班。次潘翹生。次張英。次儲振。次盧琦。次揚仙枝。次王曰溫。排班東西向立。轉向上。行兩跪六叩頭禮。老師受一答一。仍分班侍。同館交拜。行兩跪六叩頭禮。老師升公座簽押。諸年兄俱簽押畢。出至大堂。

候老師退後堂請庶常號書出老師退火房是爲修吉堂前卽五雲深處請鼎甲號書所以優鼎甲也。三學長該達多奇那思泰與彤等交拜于川堂然後請老師上席席設後堂席散歸寓放假三日然後進館讀書。

附禮部頒行臚傳儀制

康熙六年三月二十二日狀元傳臚出榜儀注是日早。

鹵簿大駕全設王以下公以上在丹陛上文武各官在丹墀下俱穿朝服排立諸貢士俱穿朝服戴三枝九葉頂在丹墀下序各官兩翼排立禮部鴻臚寺官將設黃榜案一張設于

太和殿內東傍復設黃案一張于丹陛上正中排立齊畢禮部官奏請

皇上具禮服將陞太和殿作樂既陞

殿聽贊禮官贊鳴鞭三下內院官自黃案捧榜在

殿簷下授與禮部官禮部官跪接由中階左傍下跪安置于丹陛中黃案上行三叩頭禮畢鴻臚寺官引

諸貢士至行禮處次第排立鴻臚寺官贊有

制諸貢士跪贊禮官在丹陛上東傍次第立傳

制曰奉

天承運

皇帝制曰。康熙六年三月二十日。直隸各省貢士。以策題考試。第一甲賜進士及第。第二甲賜進士出身。第三甲賜同進士出身。贊第一甲第一名某人。狀元上前跪。贊第一甲第二名某人。榜眼亦上前跪。贊第一甲第三名某人。探花亦上前跪。又贊第二甲某人等若干名。第三甲某人等若干名。贊畢。聽贊禮官贊。就跪。行三叩頭禮。又二跪。行六叩頭禮。畢。各退原處。兩翼排立。贊禮官贊舉榜。禮部官捧榜。由中階捧出。

午門前跪置

龍亭內。行三叩頭禮。校尉舉起。教坊司作樂。舉至

東長安門外。張掛于長安街。狀元及諸進士等。隨出觀榜。鑾儀衛官。贊鳴鞭三下。皇上還宮。王以下文武各官皆出。順天府官。備傘蓋儀從。送狀元歸第。